

四庫全書

集部

欽定四庫全書

皇清文頴卷首四

聖祖仁皇帝御製文

連珠

連珠

有序

朕嘗觀揚雄博綜藝文敘述短章名曰連珠班固賈
逵傅毅諸人相繼有作昔人所謂辭麗言約合於古
詩諷興之義良不虛也效其體作數首以示侍臣雖

亦假物陳義至於託寄高遠殊讓古人爾

蓋聞動靜互宅所以乘陰陽之機張弛咸宜所以體剛柔之撰是以春溫秋肅四時之玉燭常調山結川融八柱之金樞永奠

蓋聞海水納其所出故浩大而無涯車輪復其所過故廣遠而不滯是以善由虛受而萬物歸懷德本健行而上天合契

蓋聞仁義之性不因地而遷移貞白之姿不隨時為豐

嗇是以蘭蕙生於幽谷不以居僻而損其芳松栢產於茂林不以歲寒而凋其色

蓋聞知禮樂之情者能作識禮樂之文者能述疇非聖而克開疇非明而弗失是以黃軒肇則道協陰陽姬旦承謨制叅忠質

蓋聞文治深則武功大恩施溥則德威揚是以秦蕪詩書再世而致咸京之炬周傳官禮一戎而垂鎬室之裳蓋聞泰岱為五岳之宗謂其居高而不亢滄海為百川

之長謂其無容而有餘何則過剛則凌物至察則無徒
是以道主敬民若馭朽索之馬心存愛物寧漏吞舟之
魚

頌

二典頌

有序

粵稽伏羲始畫卦象而未有文詞倉頡造字而篆籀之傳亦多淹失上古文章之見於六經者殆無有先於二典者矣朕服習尚書景慕勲華之德業羹牆見焉竊以為包羅千古之治術無有出其範圍者朝夕涵濡用自勵勗爰作頌曰

煌煌二典邃古所傳乾綱坤維嶽峙星躔如海負地如

日麗天六經諸史肇開厥先欽明濬哲恭讓塞淵至德
在躬光被八埏寅餞授時法創璣璿後之儀象咸取則
焉巡嶽考績疇咨簡賢後之命官率循罔愆文質而興
事簡以全高明博厚治象歸然夏商而降踵武鴻編支
分派別謨誥丕宣散為萬象流為百川仰瞻帝典若陟
泰巔伊予夙夜誦習有年望洋測海弗憚精研遙遙統
緒深愧仔肩永言祇頌躬自陶甄

禹陵頌

有序

朕閱視河淮省方浙地會稽在望爰渡錢塘展拜大
禹陵廟瞻眺久之敕有司歲加修葺春秋蒞禋粢盛
牲醴必豐必虔以志崇報之意時康熙二十八年二
月十五日也緬惟大禹接二帝之心傳開三代之治
運昏墊既平教稼明倫由是而起其有功於後世不
淺豈特當時利賴哉朕自御宇以來軫懷饑溺留意
河防講求疏濬漸見底績周行山澤益仰前徽爰作

頌曰

下民其咨聖人乃生危微精一允執相承克勤克儉不
伐不矜隨山刊木地平天成九州始辨萬世永寧六府
三事政教修明會稽鉅鎮五嶽輓靈茲惟其藏陵谷式
經百神守護松栢鬱貞仰止高山時切景行

贊

至聖先師孔子贊

有序

蓋自三才建而天地不居其功一中傳而聖人代宣
其蘊有行道之聖得位以綏猷有明道之聖立言以
垂憲此正學所以常明人心所以不泯也粵稽往緒
仰溯前徽堯舜禹湯文武達而在上兼君師之寄行
道之聖人也孔子不得位窮而在下秉刪述之權明
道之聖人也行道者勲業炳於一朝明道者教思周

於百世堯舜文武之後不有孔子則學術紛淆仁義
湮塞斯道之失傳也久矣後之人而欲探二帝三王
之心法以為治國平天下之準其奚所取衷焉然則
孔子之為萬古一人也審矣朕巡省東國謁祀闕里
景企滋深敬摛筆而為之贊曰

清濁有氣剛柔有質聖人參之人極以立行著習察舍
道莫由惟皇建極惟后綏猷作君作師垂統萬古曰惟
堯舜禹湯文武五百餘歲至聖誕生聲金振玉集厥大

成序書刪詩定禮正樂既窮象繫亦嚴筆削上紹往緒
下示來型道不終晦秩然大經百家紛紜殊途異趣日
月無踰羹牆可晤孔子之道惟中與庸此心此理千聖
所同孔子之德仁義中正秉彛之好根本天性庶幾夙
夜勗哉令圖溯源洙泗景躅唐虞載歷庭除式觀禮器
濡毫仰贊心焉遐企百世而上以聖為歸百世而下以
聖為師非師夫子惟師於道統天御世惟道為寶泰山
巖巖東海泱泱牆高萬仞夫子之堂孰窺其藩孰尋其

徑道不遠人克念作聖

石鼓贊

有序

朕釋奠先師於國學觀石鼓於廟門之兩廡緬懷周
宣迄今二千餘年而中興之烈岐陽之蒐俯仰如昨
魯壁汲冢缺有間矣此文此石獨煥然與日月爭光
是三代法物之僅存者也今列在太學實斯文之盛
嘗尋繹榻本推詳其遺義有會於心焉乃為贊曰

猗歟周宣繼緒文武一時從臣方叔召虎蒐於岐陽陳
列斯弩鐫功告成伐石作鼓以歌以銘載規載矩豈備

考擊致煩矇瞽鼓輦思將義蓋有取歷二千年鑠日蝕
土蚪蚪失傳剝落誰補車攻馬同麀鹿麇麇晨星缺月
完句可數天門詆蕩岐山翔舞軒頡是班鍾王敢伍陳
在泮宮設於廊廡是切是磋匪擊匪拊橋門觀禮如對
簋簠庶幾文治再見三古

箴

講官箴

予企至道覃思簡編朝夕討習禮茂講筵詩人有云顯
示德行啓沃惟賢庶幾金鏡爾列詞苑莪莪在廷細旃
廣廈論史談經體之行之朕躬是力載獻載替爾職宜
飭毋務勦說毋苟雷同毋繆於正毋悖厥中在昔大儒
稱先則古學夔是師言規行矩誼貴翼勵先正其心爾
苟勿欺吐詞足欽詎曰名義可以塗飾詎曰聖賢可以

蠡測關閩瀛洛炳矣心傳撰述大旨庠序宗焉用昭儒
修用弘教澤爾其勉茲尚無攸斁

臺省箴

臺省之設言責斯專寄以耳目寧取具員通明無滯公
正無偏黨援宜化畛域宜捐洞達政體斯曰能賢古昔
諍臣風規凜然訐謏讜論垂光簡編朕每覽繹如鑑在
懸居是官者表裏方直精白乃心充廣其識國計民生
臧否黜陟凡所敷陳敬將悃愾風霜之任以懲奸慝搏
擊之威以儆貪墨毋撓細務苟塞言職毋紛成憲妄逞
胸臆書思入告當宁對揚沾名匪正營私孔傷或藏嫌

怨謬為雌黃受人指囑尤為不臧形諸奏牘有玷皂囊
職司獻替亟宜審詳敬爾在公風紀囁廊箴詞用最誕
告聯常

督撫箴

芒芒方域分理需人岳牧之選實惟重臣寄以封疆千里而遠地則星羅令猶風偃控攝文武統馭官司繩違糾慢宣德布慈廉善是旌貪黷毋宥小青是矜吞舟毋漏彼昏而墨日削月朘或市徇縱以恣撓虔澤不下殫民隱罔恤政迺不和為時蠹賊曾是源濁而流則清曾是表正而景則傾職汝之由是曰曠墜軫我元元保釐奚賴天命天討我不敢私勗哉有位敬聽箴詞

守令箴

五等封建古今異宜郡縣之制百王同規壤地磐牙提
封碁峙大者一州小則百里有社有稷有民有人守令
何職職茲拊循勸農課桑宣條設教偃風以德從星惟
好毋營筐篚毋急簿書悃悃之治歲計有餘莫高匪天
而卑其聽莫愚匪民而智其性民不可掩天不可欺一
之不慎而戚自貽稽古治效嘉禾瑞麥勉能其官紹休
前迹

銘

淵鑑齋銘

構室藝苑匪求堂皇六籍斯列百家斯藏聿求治道攬
茲舊章古人遜志歎若望洋取義于淵源深且長浩演
渟泓蓄之有常既澄其體復蘊其光清暉朗映無物不
彰於焉鑑之洞毫晰芒以茲發政如涉津梁以茲擇人
如鑑否臧我懷前哲陟降在旁見道於衡覲聖於墻實
惟簡編乃獲周行披覽之餘奧義以詳擷其精英以備

遺忘齋名淵鑑昭示無疆目擊道存文治永昌

佩文齋銘

堯紀文思舜稱文明文以經世天地精英河洛啓祕圖
書肇興典謨垂則雅頌繼聲楷模百代統歸六經乾坤
樞紐民物準繩潤如河海炳若日星簡編具在黽勉服
膺如寒待衣繭絲呈能如饑待食菽粟惟馨人倫日用
匪此莫勝紉蘭為佩楚辭可徵佩弦佩韋柔剛互成亦
有佩玉義取溫瑩予所佩者古訓是程朝斯夕斯孔思
周情味道之腴體泰志寧縹緲炳蔚卷軸縱橫研求探

討澡被性靈揭之座右恒視斯銘

知稼軒銘

史書大有惟國之瑞食為民天邦本所繫西苑有廬茅
簷土砌風雨攸除桑柘翳農祥乘春南榮晨蒞歲云
秋矣流火西次於焉占星以戒農事物養於蒙禾保於
穰驗其勾萌在晦明際雷雨甲所剛柔並試灌溉為仁
芟薙為義二者不廢穎粟可冀歲之歉穰人力是視儻
逢其時饑寒或遺閔茲農夫終歲勞瘁在昔有邵嘉種
手藝採入豳歛咏及纖細用銘斯軒庶幾此志

賦

梧桐賦

撫萬彙之生成攬植物之暢茂見藹藹之梧桐為良材
之僅覲當綺閣而結柯臨玉階而吐秀既託根以得地
亦含靈而迎候扇淑景於春陽振英華於清晝揚蕤璠
樹布葉金鑾碧滋密綴翠緡深攢散澄暉於幃幄濯鮮
色於琅玕被光華於日月耀羽儀於鳳鸞廼有芝雲上
覆瓊泉下浸長浥潤於丹穹永敷榮於紫禁雨滴疎聲

風吹籟鳴乍響迴於環珮已樂合於箏笙若夫新條始
引清露初流如潔清之士邈焉而寡儔挺節無撓陵虛
欲上如謇直之臣介然而不黨羣羣者其陰可以矢卷
阿之頌音離離者其實可以廣湛露之雅什韻虞氏之
文琴絙軒皇之素瑟信天地之嘉生非凡材之能匹彼
夫桃李之佳蔭松栢之貞心甘棠蔽芾於南國玉樹青
蔥於上林雖留詠於在昔詎埒美於斯今至於嶧山孤
立之姿龍門百尺之幹或擢本於丘樊或漸色於巖畔

豈若茲樹之曜頴朝陽植枝霄漢負聳壑之遐標增麗
城之榮觀也哉

夜亮木賦

并序

塞上古木夜視有光遇雨益明移置室中即之可以
燭物嘉其有異故賦

倚嘉木之迥異垂四照之華英蜿蜒輪囷於川壤萃盤錯
於柯莖外稟異德內蘊離精煥然夕皎灼爾宵明晚瑞
星之初麗炯璧月之漸生既騰輝於山谷亦揚彩於檐
楹若乃靈根濯雨榮枝浥露芳澤加鮮澄暉遠布方隱
之而彌耀旋即之而如晤洵昭質之無虧何冥行之是

懼爾迺金膏地葢鶴馱韜光獨飛標而振采長煜煜以
煌煌吐瓊文於赤水懸瑤景于昆岡非朝華而夕謝殆
積闇以能彰於是列之桂宮置以椒室流映金鋪近燭
緗帙豈浮艷之為容亮靈奇之足述庶含章之可貞雖
在野而靡失

玉泉賦

若夫天產瑰奇地標靈迴融則川流峙惟山靜撫風壤
之清淳對玉泉之幽靚信芳甸之名區而神皋之勝境
也爾其洞壑屢巖巖阿叢複源出高岡溜生寒麓瑤竇
濺珠瓊沙歆玉控以翔螭引之鳴瀑初噴薄以飄絲旋
滌洄而曳綬既澆潏於澗谿遂渺瀰於陵陸侔色則素
縑無痕儷質則纖塵不屬挹味則如醴如膏揣聲則為
琴為筑於是長輸遠逝澶漫演迤曲之為沼渟之為池

拭一泓之明鏡瀉千頃之琉璃排玲瓏之鴈齒跨蜿蜒之虹髻拓澄湖而西滙環仙藥而東馳當其春日載陽惠風潛扇草綠初芽柳黃欲綫捲百尺之湘漪拖十重之楚練蔭遠樹之芊綿泛落英之蔥蒨及夫長羸屆節新漲平堤林霖夕歛嵐彩晨飛抽碧筒以徐引綴丹的以紛披展含風之翠葆褰裊露之紅衣若乃炎歊既回鮮飈疎豁泠泠桂間嫋嫋蘋末見鳬鴈之沉浮望烟雲之出沒掬皓魄於晴瀾散清暉於深樾至於淒辰中律

水樹蕭騷木葉盡脫微霜始飄耿冰雪以流映擁貞萼
而後凋攬六宇之曠邈寄予懷於沲寥是其為狀也何
時不妍何妍不極境近心遠目營神逸有林垆之美而
無待於攀躋有亭榭之安而無勞於雕飾豈所語於入
華林者擬濠濮之遊涉太液者象蓬瀛之域也耶

行殿讀書賦

并序

東巡十有餘日矣寒夜初永行幄清肅取大易尚書
及前代史籍探索披覽夜分乃休侍臣高士竒每以
過勞為請然朕勤政愛民之外惟涵泳乎詩書心契
古人寤寐勿倦非此何以自樂耶乃作行殿讀書賦
以示之

紹

三后之令緒兮撫曩代之遺蹤爰省方而設教兮言時

巡乎究東軫予懷於郛屋兮息予駕於蒿宮發圖書於
行笈兮窮墳典於淵通遡帝王之餘烈兮勤效法之深
衷昔唐虞之詢岳兮闢四門而明目禹泣罪而下車兮
湯解網以致祝文獵渭以求賢兮武邁邦以問俗景列
聖之芳模兮希千秋之懿躅庶咸五而登三兮亦觀光
而式穀惟時商秋甫謝寒律初尋風日高肅雲物蕭森
陳羽衛之清約兮憇幄宮之靜深愛三冬之暇景兮惜
萬幾之餘陰於是心曠神怡氣恬神攝玉蚪晝嚴銅螭

宵歇望山海之崇深兮凜載登而載涉詎博洽之自矜
兮何菁華之足獵鄙虞初之屬車兮陋河東之遺篋冀
文教之永敷兮播風聲而四浹

闕里古檜賦

并序

孔子手植檜在杏壇之側金貞祐間無復存矣元至
元三十年再茁故處明弘治間又燬於火今所遺者
不枯不榮屹立霜露而秀色獨異撫摩久之廼作賦
曰

維槎枿之靈質實鈞化之所鍾標扶輿之奇特峙先聖
之故宮涵元氣以不朽與至道而俱崇爾其黛幹蒼蒼
孤柯濯濯鶴骨初扶霜鱗未作儼茁軋以方舒類鴻荒

之忽鑒謝縹彩於春華完淳風於太樸夭矯拂勃星臨
露滴枝無取於樛樛葉全稀於撼撼夕飈度兮弗驚朝
旭烘兮如滌伊間氣之潛滋惟神爽之咸集徘徊延却
宛轉斷連蟠屈兮若佾羽之在列聳削兮若奠簏之待
懸則有築以崇封沃以膏壤方以周闌角以文磔足縮
心歛目給神賞蘿烟奪翠松籟失響於是楷因之而擢
穎著感之而抽莖爭歲蕤於絃誦之里齊扶疎於禮樂
之庭朝菌慚兮一旦大椿讓兮千齡上訴真宰之功遠

契無為之代均雲行兮雨施等乾始兮坤載疇則出混
茫之中而居耳目之外與三才以並植縣歷禩其長在
亦有扶桑海表若木山巔東瀛西極揭日摩天迹雖誇
於神異植非出於文宣宜瞠乎其後矣邈無得而稱焉

木棉賦

并序

木棉之為利於人溥矣衣被禦寒實有賴焉夫既紡
以為布復杼以為紬卒歲之謀出之隴畝功不在五
穀下嘗稽之載籍島夷卉服註以為吉貝即其種也
然止以充遠方之貢而未嘗遍植於中土故周禮婦
功惟治蠶臬唐徵庸調但及絲麻至木棉之種後世
由外蕃始入於關陝閩粵今則遠邇貴賤咸資其利
而昔人篇什罕有及之者故為之賦曰

考古貝之佳種披丘索以窮源道伽毘而遠來由秦粵
而衍蕃倣崖州之紡織製七襄而無痕倣宋人之并澣
比八綿而同溫先麥秋而播種齊壺棗而登原宿黃雲
於萬葢墮白雪於千村落秋實於露晞軋機軸於星昏
煖佐耆年之帛陽回寒女之門幸卒歲之可娛乃民力
之普存若應鐘之司律正薄寒之中人月照牛衣之夜
霜侵葛屨之辰家挾千箱之續路絕百結之鶉曝茅簷
而歌愛日賽田祖而洽比鄰謝履絲之靡麗免于貉之

艱辛故夫八口之家九土之氓無沍寒之膚裂罕疾風
之條鳴時和年豐水耨火耕歲落三鍾之棉塲登百畝
之稅同彼婦子樂此太平奚羨纂組之巧與夫縞紵之
輕慨風詩之未錄省方問俗將以補幽什而續授衣之
經



皇清文穎卷首四

欽定四庫全書

集部

皇清文頤卷五

六

詳校官檢討

臣朱依旻

主事銜

臣徐以坤覆勘

覆校官中書

臣

田尹衡

校對官監丞

臣

張曾炳

謄錄舉人

臣

楚惟榮

欽定四庫全書

皇清文頴卷首五

聖祖仁皇帝御製詩

四言古詩

長至日記

天園丘有述四章

於穆天緯鑒觀維赫播物無私佑於有德

高皇受命膺符闡繹丕顯

太宗廓圖登績眷我

皇考九圍是式克享

天心立民之極

一章

洪維景運集於眇躬南諧北變君茲萬邦夙夜敬止恒
惕於衷母曰高高聽卑則聰母曰盱盱視遠斯通罔敢

逸豫昭事必恭

二章

是月仲冬維日長至爰啟

泰壇肅將禋祀濟濟奉璋羣工在位牲玉既陳籥舞乃

備對越有虔百神攸暨雲旃揚揚華星哲哲

三章

乃辨雲物載觀載書乃占豐年多黍多稌南陸曜采道
我歸輿芸香始生景長以舒初陽來復相協厥居垂象
是則奉若不渝

四章

五言古詩

覽貞觀政要

春陽淑以嘉流雲灑几案及此聽政餘縑緗獲披玩寥
寥三古後載籍亦炳煥俯仰千年餘盛治數貞觀脩德

偃干戈措刑空徃狂海外奉車書臣民登燕衍事往迹
尚存流風照觚翰洋洋四十篇可以一辭貫仁義有明
效非由事擊斷鄙哉封倫言相去邈河漢

時巡近郊憫農事有作

芳郊景物麗淑氣扇暮春靈雨應良節光風薄嘉辰省
耕已屆候夙駕方來巡前驅列式道羽衛羅鈞陳時有
田間子荷耒披車塵譏訶勿頻數疾苦當咨詢千耦幸
終畝二鬴猶懸困穠蓂爾勤動痼瘵予隱親賙賜出泉

府拊循屬官臣行潦有挹罷列井無枯津所惠良未徧
嗷嗷愧斯人

懋勤殿讀尚書至無逸篇有作

元化幹四運淑景催芳年乾乾總萬幾寸陰惜屢遷綈
几散瑤帙阿閣颺鑪煙澄懷求至理孔壁存遺編公旦
訓無逸則古多所宣言念小民依田功稼穡先天命良
匪易敬德省厥愆法戒備近王炯炯斧宸前寤寐思古
人千禩精意傳端居不遑暇三復期勉旃

詠觀天儀器

乾象極高遠孰者為綱維惟此貞恒理可以揆測知靈
臺有儀器云自古聖貽偃蓋金祭祭飾體珠離離橫玉
筦其中激水相推移內挈黃赤道外互南北垂紫宸凝
不動列曜如置碁制作倅造化法撰窮神竒昔在有虞
氏以命和與羲七政順其軌庶績咸用熙後來代有述
神明夫前規日官比申命欽哉重人時惟幾恒自勅曰
旦凜在茲五緯協位序燠寒無僭差永言答靈眷長與

休禎期

秋日出郊觀稼

秋氣日寥迴萬象皆蒼蒼
朝暎被渥露草木含晶光
西成方屆候農事將築場
於焉省斂穫令典重百王
輕軒屏前置夙駕無嚴裝
郊原一以眺烟樹紛成行
微風散深樾清流抱迴塘
土脉秀且沃篝車鬱相望
新鑣粲如月刈此溪雲黃
捃拾復何幸遺秉滿道旁
鳥雀互翔集婦子咸悅康
行將吹葦簫報爾千斯箱
眷言三時勤艱

難詎可忘茫茫視九壤豈盡歌豐穰二鬴苟不充子饑
怒如傷幸茲樂有年時若雨與暘最哉慎所麗田功庶
無荒

端寧殿齋居

肅肅羣籟屏裊裊鑪煙舒詎日躬禋祀濯被臨齋居輝
輝閤西日流影照綺疏坐久微風來泠然吹衣裾霽心
觀萬象默見天地初感神在至誠寧俟灌毫餘

詠史四首

鴻鈞運元氣萬彙無私恩上德貴醇悶容覆如乾坤熙
熙康衢老作息循晨昏耕鑿食其力安知帝德尊在宥
物自理巧歷難為言下覽商周際頌聲亦已繁

其二

三田歲畢舉用以薦明禋聖王戒暴殄郊藪遊麒麟虞
羅張復解原野氣已春六合豈不廣一面何逡巡亳都
百里間曠如天地仁寬政逮毛羽况乃蚩蚩民

其三

軒皇訪后收相道光璿樞精誠契冥漠在古豈有誣巍
巍興王佐竟與夢寐符天意靖殷邦豈為榮一夫緬彼
耕莘叟後有版築徒試觀說命篇典則追三謨

其四

尚父抱奇略壯齡運不偶一竿清渭濱經綸在其手志
欲網九州吞舟非所取卜兆示先幾龍輿載車後白旄
師既陳青社符還剖偉哉八百基肇自一釣叟

二月三十日親統六軍徂征漠北

惟天盡所覆眷命畀我清自予莅鴻祚恒願銷甲兵小
醜窺北疆屬國橫相撓夙昔張撻伐兇醜皆顛傾赦之
釋不誅開網全其生怙終恣跳梁邊鄙搖羣情皇皇仁
義師聲討必有名春雪灑貝冑朔風捲龍旌睠茲貔虎
士金革勞遠征於鑠振我武赫赫揚天聲

經明成祖勒銘處指示扈從諸臣

并序

朕率師行四十五日至我哨界內外高阜坡陀大
抵皆黃白沙五色石北行十一里有石瑩然獨出明

成祖北伐刻銘其上時則永樂八年庚寅四月十六日朕今過此適在四月十四日山原猶昔時日同符朕謂明成祖之率師而行也與今日異其時出邊皆敵人也今蒙古悉我効力之人其時皆漢人步卒今我兵悉騎士且熟習邊外之行由此觀之明成祖深入敵中數千里縱橫若行無人之境亦誠難矣我軍若不及彼良可媿也凡聞斯語者當人人自奮焉爰紀其事而繫之以詩

伊昔永樂年征馬嘶朔風磧間銘片石苔蘚磨青銅我
行初拂拭夏節欣相同當時月在巳今值清和中後先
間兩日彼亦一代雄我武討不庭春發明光宮塞草綠
微茁雨雪陰濛濛或言時尚早稍待邊花紅寧知英傑
人所見良䟽通迅行掩不備兵法貴折衝軍謀在帷殿
士氣如虎熊豈不資羣策惟斷斯有功作詩紀其事聊
以示臣工

行殿示諸皇子

師行日已遠邊馬風蕭蕭眷言靖疆宇寧憚道路遙彼
寇鄰北藩譎謀聲動搖除惡必拔本根莠陳良苗外攘
內斯安務令金甲銷吾民息轉輸丁男無散彫一勞方
永逸所戒怠與驕天心鑒此誠雨暘時以調

厄魯特之衆相繼來歸咸詢其父母兄弟妻子為
陣前所獲者覓令完聚

締宇莅八表一視貴同仁苟有不得所此中常肫肫荒
裔乃異類獬鷲性頑嚚橫戈臨朔漠窟穴頓淪湮將士

俘擒衆竄遁僅及身逋亡日來投稽首丹悃申念彼骨
肉離咸為加撫詢廣諭命尋識使得完天倫歡聲繼感
泣寒塞生和春綏柔寓大權萬物歸鴻鈞

黃河

并序

河源發於塞外流經萬里餘始由中土入海曩曾遣
使探流窮源河之為利為害莫不洞悉近以巡省邊
隅駐蹕湖灘河朔一水滌洄自西北來流不甚濁而
波緩岸隘而土堅白草蕭蕭黃沙彌望其中環抱約

地千二百餘里草豐水美便於畜牧明弘治間淪於外曩地逼秦境時相寇擾故諸臣每言不宜棄此衆議紛然人多不察恒惜其言之未用然使當日即用其言加兵塞外揆理度勢豈遂能驅而遠之亦必徒勞士馬耳朕嘗以收復河套之論謂其心忠於國則可謂其灼見事幾言之可行則未然也國家威德所布龍荒大漠與河套盡入版圖諸蒙古歲脩貢奉職惟謹非務德意綏柔詎兵力之所可致耶故臨流

增思詩示永久

洪流遠且長迢遙逾塞垣旋繞幾曲折沙雜波濤渾漸
下漸開拓建瓴勢迅奔所經雖繇邈脈絡自有根東南
藉輓輸疏濬頻討論昔歲省隄防淮濟親臨軒今茲歷
大荒羽衛成雲屯峻嶒兩岸間天寒落漲痕冰漸斷更
續晶晶耀朝暎此中地沃饒水草佳且繁昔人議收復
斯舉誠難言觀俗撫幽遐老幼爭攀援殊方亦蒼赤咸
施沐浴恩期令歸化意來者如河源晝夜入滄海包括

彌乾坤

噶爾丹平後示諸臣

莅寓心無倦寧人慮每周一從沙漠擾時厯深宮憂日
旰食始進未明衣先求或云小醜徒廟堂何須籌或云
自往代茲類難鋤擾念我

祖宗基不與古昔侔沿邊諸外藩奉職如列侯一一効
驅策非徒貢責脩顧此豺狼種狂逞匿林丘侵欺我屬
國潛入我遐陬設竟置罔聞何以示綏柔因之違羣議

秉鉞麾貔貅扼塞伏偏師兼程裹糧餽事無巨與細皆
為先綢繆五月入不毛破賊瀚海頭遁免僅及身資帳
咸蹢躅秋冬再臨邊寒風透重裘方春更遠陟秦晉歷
邕州乞降多詭詞其意本夷猶孽子已成俘族黨紛奔
投未能悔厥心尚思延蜉蝣分道命禁旅夏肅氣如秋
頓爾膺天誅無庸施戈矛幕南與幕北圖興萬里收華
山可歸馬桃林宜放牛息兵培元氣黎庶永安休於野
樂稼穡於朝獻訐謀交泰賴臣工長與蒙天庥

凱旋言懷

黃輿奠四極海外皆來臣眷言漠北地荒荒皆吾人六
載不遑息三度勤征輪邊析自此靜亭堠無煙塵兵革
方既偃風教期還淳興廉遵昔軌崇文育羣倫所用惟
才俊非僅柴簪紳爾俸與爾祿脂膏出細民永念固邦
本不媿王國賓

口外設屯耕植聚落漸成

沿邊曠地多棄置良非策年來設屯聚教以分阡陌春

夏耕耨勤秋冬有畜積霜濃早收黍暄遲晚刈麥土固
有肥磽人力變荒瘠山下出流泉屋後樹豚栅行之無
倦弛定能增戶籍古來王者治恐亦無以易

七言古詩

收復岳州作

并序

逆賊吳三桂既經天誅之後不數月而岳城恢復良
由三桂背恩倡亂荼毒生靈經年以來死者相望於
道路生者逃竄於四方積尸遍野民不聊生皆朕德

之薄不能撫綏之故也今賴

皇天之眷佑

祖宗之威福羣臣盡力將士用命前後恢復閩海兩粵
以至湖南岳陽諸處擒斬賊魁殆盡望風歸正不可
勝數所餘小醜勢如破竹解吾民之倒懸行有日矣
特賦長歌以舒其懷

聿予涼薄莅洪荒遂使巨慝亂天常東南黎庶苦紛擾
幾年戎馬蹂疆場臨軒重簡親藩出軍威萬里風雷疾

肆伐原因討不庭專征大義昭星日臥榻安容有悖狂
太阿豈好弛紀律再敕元臣佩虎符戈矛剗地生寒栗
鐵騎驍騰擁楚雲霓旌閃爍連江漬七澤三湘據衝要
樓船壁壘屯諸軍一時將士盡忿激人人都願成功勲
懸知叛逆衆所惡直湏吹氣清妖氛顧此生靈負何罪
流離轉徙多饑餒處處田疇蕪不耕年年桑柘無人採
聞說荒榛遍野廬還傷老弱填江海每念邊陲一撫然
立身天地慙主宰未忍加兵戕我民深宮宵旰勤五載

五載躊躇常恭默會當滅此乃朝食旗捲閩疆甲士降
陣開百粵堅城尅已見懷光伏冥誅更看元濟成俘馘
輦鼓旌旄定岳陽琚戈金鏃清區域指顧能收六詔煙
宣恩早布招徠德書奏傳來慰

兩宮又安社稷開鴻濛翼翼小心恒敬慎敢忘繼述在
朕躬期與宰司百職事共相砥礪克厥終

自寧夏出塞濱河行至白塔乘舟順流而下抵湖

灘河朔作

黃河之源難可窮滔滔來自遐荒中既入洮蘭復西出
飛濤浩瀚聲淙淙來從邊山遠跋涉遣師輓餉兼採風
迴鑿欲假順流便特乘艇艦浮奔洪濤洄大野勢幾曲
沙岸頽突還龍從亂柳排生枝幹密中有巨鹿藏榛叢
遙山轉轉行莫盡忽前俄後迷西東有時塞雲催急雨
晚天霽色橫長虹旌門月上夜皎潔水光直與銀漢通
放櫂百里只瞬息迅於走坂馳駿驄中宵望見旄頭落
幕北已奏煙塵空

四月十四日夜奏報噶爾丹窮蹙自盡其下悉平

茲行永得

息兵革豈惜曉暮勞予躬長河繇延古鮮歷巡閱乃與
區域同自此寰海樂清晏熙恬萬國咸亨豐

長安行

河山天險古金湯都邑規模溯漢唐陸海膏腴本沃壤
秦風慄悍稱巖疆每因睠念勞中夜忍使時巡後一方
遠幸衝寒訪民隱終南太華遙相望函岐不乏耕織業
漆沮尚存蒐狩場重農藏富屢詔諭雨暘時若歌豐穰
雄兵超距賈餘勇野老謳吟多宿糧要令遐陬沾湛露

詎以無事弛邊防大閱三軍訓甲士來朝諸部趨蕃王
蠲租恤下恩未已共躋仁壽樂且康渭水冰消回暖律
南山煙靄動初陽停鑾懷古還披卷宵旰勤求意不忘

松花江放船歌

松花江江水平清夜來雨過春濤生浪花疊錦繡縠明綵
帆畫鷁隨風輕簫韶小奏中流鳴蒼崖翠壁兩岸橫浮
雲耀日何晶晶乘流直下蛟龍驚連檣接艦屯江城貔
貅健甲皆銳精旌旂映水翻朱纓我來問俗非觀兵松

花江江水清浩浩瀚瀚衝波行雲霞萬里開澄泓

望焦山念已巳曾登其上

大江日夜波汪洋金山焦山兩相望金山樓閣蕩丹碧
焦山竹樹多鬱蒼境深流廣人罕至往年曾一登其岡
頃者放舟仍北度壯哉滉瀟雲低昂青巖翠壁幽且清
圖經名著傳焦光何時瘞鶴在山足遺銘剝蝕存華陽
山下有瘞鶴銘為華陽真逸撰止存六十餘字葭洲白鳥忽飛出江花冥冥江
草芳是日雨餘氣清淑夏首晴晝欣舒長倚檻四顧暢

襟抱好風豁達來天閭

海東青

羽蟲三百有六十神俊最數海東青性秉金靈含火德
異材上映瑤光星軒昂時作左右顧整拂六翮披霜翎
期門射生諳調習雄飛忽掣黃絲鈴勁如千鈞激砮石
迅如九野鞭雷霆原頭草枯眼愈疾眊然一舉凌高冥
萬夫立馬齊注目下逐鳥雀無留形爪牙之任安可廢
有若猛士清郊垌瞭鷹築臺存勝蹟佳名豈獨標禽經

松花江網魚最多頒賜從臣

松花江水深千尺，楫棹移舟網親擲。
溜洄水急浪花翻，一手提網任所適。
湏臾收處激頽波，兩岸奔趨人絡繹。
小魚沉網大魚躍，紫鬣銀鱗萬千百。
更有巨尾壓船頭，載以牛車輪欲折。
水寒冰結味益佳，遠笑江南誇魴鯽。
徧令頒賜扈從臣，幕下燃薪爇烹炙。
天下才俊散四方，網羅咸使登巖廊。
爾等觸物思比託，捕魚勿謂情之常。

再遊盤山

薊州城北黃崖前水甘土厚多平阡崇山特起矗霄漢
枯栢夾路陰叅天回巖褱嶂倍娟秀幽林邃谷時黃緣
雲藏古寺行未到樹杪先有鐘聲傳數峰突兀勢陡絕
上迫箕尾雙星躔峩峩石狀獸蹲立因風搖曳如空懸
深潭清冷那可測知是百尺神龍淵鉢泉恍惚有海眼
潮井呼噏通百川不然泛濫亦易挹何為萬古清涓涓
神工融結天巧鑿更騁遠目窮高巔漁陽古郡最阻阨
屹為左輔雄幽燕即今交河遠置候此實堂與非臨邊

太平粗喜有端緒石根沙磧皆原田偶茲登陟聊駐旆
用寄襟抱題斯篇

皇清文穎卷首五

欽定四庫全書

皇清文頴卷首六

聖祖仁皇帝御製詩

五言律詩

咏蟬

飲露當涼夜吟風向晚晴
乍移深樹影又聽別枝聲
與物心無競離塵翼最輕
秋懷聊寄咏愛爾獨能清

入喜峰口

一道鳴鑾度三驅振旅還莓苔天半石松枯雨中山險
設關門壯時清埃火閒

孝陵佳氣近縹緲翠微閒

夏日迎薰亭

苑啟時初夏亭陰午未關雨過池藻碧日綻海榴丹水
木含清景禽魚得靜觀薰風能解慍試取玉琴彈

曉發古北口望霧靈山

流吹凌晨發長旂出塞分遠峰猶見月古木半籠雲地

迴疎人跡山迴簇馬羣觀風當夏景澗草自含薰

塞外省覽風俗

莫道巖關險要荒總一家戍樓無鼓角戰壘是桑麻野
靜知民樂時清見物華林中歸徑晚旌旆滿煙霞

過

闕里

鑾輅來東魯先登夫子堂兩楹陳俎豆數仞見宮牆道
統唐虞接儒宗洙泗長入門撫松柏瞻拜肅冠裳

闕里古檜

幹聳朱甍外根盤碧殿阿奇文成左紐元氣挺孤柯瑞
與龜龍竝傳來歲月多徘徊看手澤不共劫灰磨

出居庸關

羣峰倚天半直北峙雄關古塞煙雲合清時壁壘閒軍
鋒趨朔漠馬蹟度重山漸向邊城路旌旗疊翠間

賜將士食

萬騎擁雕弓長鳴向北風龍荒彌曠遠虎旅正驍雄戰

鼓黃雲外旌門紫氣中朕躬方蓐食與爾六軍同

瀚海

四月天山路今朝瀚海行積沙流絕塞落日度連營戰
伐因聲罪馳驅為息兵敢云黃屋重辛苦事親征

外藩諸部落絡繹來賀宴賚之

諸部名王集扶攜繞御營皆言清朔漠從此樂生成喜
湓車書會歡騰鼓角聲朕懷勤撫恤所志在休兵

十一月三日泛舟黃河流凌始下舟行之頃河水

瑩潔波浪忽平

黃濤何洶洶寒至始流凌解纜風猶緊移舟浪不興威
行宜氣肅恩布覺陽升化理應多洽囂氛頃刻澄

入沙虎口

秋末巡沙塞冬深六轡還野迴千澗水雲掩百重山獵
獵寒風勁駸駸班馬閑勤勞因國事計日對

慈顏

保德州渡黃河

入塞河聲壯朝宗勢拱環劃疆分晉野隔岸是秦山城
郭巔崖裏旌旄浩渺間橫流渡舟楫前路指蕭關

晚眺

軍門延夕眺雲氣澹遙天古塞千峰月平沙萬幕烟旌
旗寒色壯刁斗晚風傳畔甲從今始功成靖朔邊

過密雲作

秋氣驅殘暑青林墮葉稀馬嘶涼籟動蟬噪夕陽微河
繞遙通塞山迴盡拱畿黍苗膏雨足歲事念民依

興京

靄靄興王地風雲莫可攀
滌洄千曲水盤疊百重山
瞻拜

陵園肅凝思大業艱
龍蔥松柏茂瑞鳥滿林間

曉發嘉興

數里城依水千門路向田
菜塍無近遠桑岸互綿連
土沃勤為最年豐儉欲先
雲開林野秀初日上行旃

花山

警蹕來初地青山鳥道深風生松澗合雲暗石苔侵靜
晝飛閒蝶餘春噪晚禽空留支遁跡物外託宸襟

仲子廟

河口孤祠在千年祀典存當階松半偃繞碣蘚堪捫懷
古題新額遺風想聖門行舟清晝永岸草採芳蓀

大城文安等處堤修完舟中駐蹕王家口

積水頻縈慮長堤幸已成桑麻連井邑花柳近清明漸
愜勤民意還深問俗情蘭橈經過處布穀喚春耕

七言律詩

塞上宴諸藩

龍沙張宴塞雲收帳外連營散酒籌萬里車書皆屬國
一時劒珮列通侯天高大漠圍青嶂日午微風動綵旂
聲教無私疆域遠省方隨處示懷柔

瀛臺

紅闌橋轉白蘋灣疊石參差積翠間畫舸分流簾下水
秋花倒影鏡中山風微瑤島歸雲近日落清霄舞鶴還

乘興欲成蘭沼詠偶從機務得餘閒

滇平

洱海昆池道路難捷書夜半到長安未矜干羽三苗格
乍喜征輸六詔寬天末遠收金馬臨軍中新解鐵衣寒
回思幾載焦勞意此日方同萬國歡

呂翁山是

聖祖太宗文皇帝擒洪承疇處

旌旗直捲陣雲沉濠塹遺蹤尚可尋十萬健兒皆解甲

一時大帥此成禽
民情效順當年事
王業維艱
聖祖心遂使關西如破竹
至今戰氣晝陰森

駐蹕大凌河

歸騎雲屯向晚過
昇平笳吹動鐃歌
光搖幕火繁星燦
影暗旗風野霧多
兵氣已銷沙右所
軍聲猶壯大凌河
豐京老將還能說
曾記前途自倒戈

回鑾抵古北口

黃谷清河古戍間
鑾車此日省方還
長林曲抱千溪水

小徑斜通萬仞山地扼襟喉趨朔漠天留鎖鑰枕雄關
時平不用誇形勝雲物秋澄斥堠閒

玉河春水

春回凍解玉河清
潏潏晴光繞鳳城
翠嶺雪消新漲闊
綠楊風動曉波平
派分星海千重遠
色映銀潢萬里明
欲挽朝宗無限水
徧流膏澤慰蒼生

後苑漫興

佳氣青蔥繞苑牆
紅泉紫岫勝雲莊
雕闌細草經春滿

綺閣繁花入午香
雨露生成隨品類
鳶魚飛躍自低昂
閒亭久坐渾無事
靜對琴書覺意長

登岱

巖巖岱嶽高無極
攀陟遙登最上頭
路轉天門青靄合
峰迴日觀白雲浮
振衣截竊凌千仞
騁目蒼茫辨九州
欲與臣鄰崇實政
金泥玉檢不須留

泛舟西湖

一片湖光瀲灩開
峰巒三面送青來
輕舟櫂去波添影

曲岸移時路卻回
春色初搖堤上柳
惠風正發寺邊梅
此行不是探名勝
欲使陽和徧九垓

春寒軫念將士

大漠春殘雪尚飛
從征車馬正駢駢
風迴沙路迷金勒
寒送冰花上鐵衣
每念折衝憑士氣
况從絕徼奉天威
六軍同奮赴桓志
佇見晴曛滿翠旂

入關見雨膏潤澤禾苗茂遂喜而有作

甘雨時霖為洗兵
恰逢戰勝武功成
軍容萬隊初旋凱

婦子千邨正饁耕天意要荒同職貢人歡閭井共昇平
征途每憶民生事喜見桑麻愜此情

入京見百官及耆民童稚歡迎道周

星旂葆羽禁城闐雨霽郊垌不動塵旭日薰風歸凱路
黃童白叟太平人正逢師至經三月敢比苗頑格七旬
從此普天無戰鬪更將休養勗臣鄰

出塞 并序

沿邊山行岡嶺崎嶇黃沙彌望因自榆林鎮取道塞

外沙淺途平水草咸便且十二日之程減半得達安邊堡書以記之

森森萬騎歷駝城

榆林鎮一名駝城

沙塞風清磧路平水泮長

河堪飲馬月來大野照移營郵籤紀地旬餘驛羽轡行邊六日程天下一家無內外烽銷堞罷不論兵

經泰山之麓

并序

曩於甲子冬日登泰山之巔覽秦漢以來故蹟俯眺衆區憑臨滄海今茲南巡復稅駕山麓因望岱宗而

展禮焉

聳巘高峰記昔攀春回瀑水響潺潺萬層石級雲霄上
千里烟邨縹緲間暫駐猶然思往事憑陵直欲小人寰
朱旗翠葆疎林外已見巍巍俯衆山

入居庸關

始和羽騎出重關風動南薰整旆還凱奏捷書傳朔塞
歡聲喜氣滿人寰懸厓壁立垣墉固古峽流泉晝夜閒
須識成城惟衆志稱雄不獨峙羣山

舟行野望

惠風萬頃下芳畦
遠水拖烟曉狀迷
河上草新纔覆地
林間花墮半沾泥
翩翹弱燕穿船入
宛轉芳鶯隔樹啼
若問撫闌端坐意
默思豐裕洽羣黎

五言排律

臺灣平告祀

孝陵有述

繢武平瀛海諏辰謁

寢陵翠微千嶂拱紫氣五雲凝

聖德光垂裕神謨大顯承乾坤資翕闢日月象升恒奕
世謳歌集多方歷數膺遠猶思燕翼盛業想龍興卉服
皆來享鯨波自此澄明禋稽舊典萬禩肅嘗蒸

南苑元靈宮是

世祖皇考建

傑閣橫霄峻清都與漢翔規模開壯麗星宿燦輝光碧
瓦浮空翠金鋪映日黃門當啼鳥靜戶有異花香細草

沿堦發新槐拂檻涼紆回疏輦路藻彩繪雕梁警蹕臨
仙境瞻依問谷王敬欽崇太昊繼述憶

先皇歲月碑文古乾坤事業昌茫茫扶大造皞皞體穹
蒼恭已身無倦齋心念不忘時巡非逸豫幾暇豈遊荒
衛騎驂驪列華旄宛轉颺南薰披萬物北斗啓千祥瑞
氣庭前見佳辰晝正長休歌白雲曲吾道在惟康

三月初六日告祭

福陵恭述十韻

瑞靄鍾靈闕晴煙繞閼宮萬山皆拱北百水盡洄東天
矯盤峰秀紆迴磴道通俯看環衆象遥睇極高崇松柏
九九直岡巒面面同恢弘思

祖烈建樹本神功戰術無前略謨謀啟後衷揮蛇曾握
劍定鼎有遺弓展禮威儀整申誠俎豆豐車書叨繼統
貌爾媿微躬

五言絕句

野望

嶺外茅茨小林端烟火遲田家耕鑿意一一九重知

次楊嶺北

半嶺黃雲合新涼畫角聞羶羊沙草外落日自為羣

湖心亭

水上起樓臺湖面平如鏡春風吹柳條遠與山光映

自過江至常州府雜咏

第一首

風平楊子渡舉棹過長江暮色林低水晴光月照牕

六言絕句

水淀雜詩四首

輕舟十里五里垂柳千絲萬絲忽聽農歌起處滿村紅
杏開時

春水船行天上冷風雨過田家深樹幾聲布穀晚晴千
縷明霞

銜泥雙燕沙際喚雨單鳩樹頭昨夜桃花新水鯉魚躍
入蘭舟

為愛沙明水遠更看柳顰花新草木禽魚咸若河山民

物同春

平原

冬晴柳葉未落潦盡寒潭初清龍鑣千騎萬騎雁隊一聲兩聲

七言絕句

由廣泉寺至臥佛寺

巖邊青竹低臨水雲外嵐峰半入天僧舍無人常寂寂
山門迴繞是寒泉

初寒

灑雪凝霜正渺漫
曉來朔色滿林巒
何當吹遍鄒陽律
盡却人間黍谷寒

尖峰山谷口作

寒山秀出亦娟娟
細路穿林碧磴懸
却為晚來飛雨過
數峰橫翠入寒煙

巡歷塞北雜咏

第一首

疊嶂層崖一綫開
草深徑路絕塵埃
龍沙雨後灤河水

日夜朝宗入塞來

曉發虛谷

帷宮雨後納新涼
虛谷風來百草香
萬里晴雲任舒卷
憑高但見碧天長

飛來峰

巖岫峻嶒洞壑奇
懸藤古木半迷離
冷泉亭子清溪上
誰識源頭混混時

惠泉

寒雲覆樹昔年經

甲子觀惠泉在十月

再品山泉到此亭春水一

犁農事足喜看膏雨徧郊垌

春晴舟中作

野水漫漫野岸長幾行嫩柳帶斜陽不知春色來多少
但覺飛花處處香

克魯倫河上流雨後草生

晚從岸曲駐前旌雨歇行營草怒生一望青青河上色
平蕪共聽馬嘶聲

班師次拖陵

戰馬初閒甲士歡揮戈早已破樓蘭
彌天星斗銷兵氣照徹邊山五月寒

南口

鑾輿歷遠度龍城已近郊圻一日程
時雨潤來山翠重更添高下小溪聲

登雞鳴山

鳥道盤空近塞垣羊河如帶繞山根
停鑾欲覽沿邊勢

石上藤蘿手自捫

山行

古木荒山落葉稀
寒流幾曲漾斜暉
馬蹄行遍龍堆路
總是金湯戶外扉

曉寒念將士

長河凍結朔風攢
帶甲橫戈未即安
每見霜華侵曉月
最憐將士不勝寒

經喀爾沁

古木蒼山路不窮
霜林颯沓響秋風
臨流駐蹕歸營晚
坐看旌門落照紅

菜畦

東南農事已春深
菜隴花開滿地金
獨愛小民勤力作
馬頭堪慰省方心

支硎山

龍池東北古支硎
石室寒泉句可聽
支遁詩云石室可
蔽身寒泉濯溫手
想得雨餘懸瀑布
飛流界破數峰青

江行

風帆來往亂江流
樓櫓縱橫拍浪浮
只在艚工持柁穩
曾將為政喻操舟


春行

愛此融融養育多
平原高下識恩波
雖然迅速春難住
四季何嘗離太和

未開新荷

清和將盡未端陽
時雨催擎珠點涼
不染淤泥看淨植

雖無花氣葉先香



皇清文韻卷首六